

Verslag vergadering

Streektaolambassadeurs

Dinsdag 22 september 2020

19.30 uur

Huus van de Taol

Anwezig: Bertus Mos (De Wolden), Willy Weerman (Börger-Odoorn), Rinus Bouwmeester (Assen), Tea Nijhuis (Noordenveld), Jan Hartlief (Aa en Hunze), Ans Klok (Westerveld), Yvonne Bijl (Hoogeveen), Henk van Tellingen (Coevern), Leny Hamminga (Tynaarl) en Geert Woldman (Midden-Drenthe), Renate Snoeiijing, Arja Olthof
Ofwezig(MK): Eduard Annen (Möppelt), Annemiek Drenth (Emmen)

1. Lösdoen

Renate döt de vergadering lös en het elkenien van harte welkom in Beilen. Zie is bliede dat de streektaolambassadeurs weer een maal bij mekaar bint.

2. Rondtie hoe het nou giet met elkenien

Het blek dat elkenien de toen der echt prachtig bij liggen hef, dat er veul fietst wordt en Jan en Henk geregeld de hengel oetgooit (veur pieren kunt ze vanof nou terecht bij Rinus, die een hiele kolonie under zien terras wonen hef). Ans toert in de cabrio deur Drenthe. Tea en Rinus kunt sokkies breien gaon, want die kriegt beide in febrewari folgend jaor een kleinkind derbij. Leny heur zeun zit in de meziek en die hef het wal hiel stoer in dizze tied, want die verdient daor zien stoet met en der is dit jaor vanzölf gien krummel te verdienen op dat vlak. Willy is op dit moment leraar veur zien kleinzeun, die niet naor schoel giet umdat e zwakke longen hef en een zwaore allergie veur neuten/pinda's. Yvonne zit dit jaor in de achtbaan ; nei wark, een kleindochter geboren, va overleden, heur zuster in het ziekenhoes, een nei boek én prissenteren bij *Koopman op Pad*.

In de iene gemiente bint de streektaolambassadeur en de streektaolvrijwilliger wal bij mekaar west, in de aandere niet, maar daor holdt ze contact via whatsapp/mail. Wij hebt vanoet het Huus van de Taol angeven dat het wal of niet samenkommen gien verplichting van oes is. As 't kan, is 't mooi, al is 't allén maar um de contacten warm te holden. Maar as 't niet giet, is 't ok goed. 't Is niet aans, in dizze tied en gezöndheid stiet nou ienmaal veurop!

Wij maakt oes allemaal zörge over de tweede Corona-golf die nou an de gang is.

3. Inkommen en anheurd

Wij hebt 't nog even had over het **ofscheid van Jan Germs**. De streektaolambassadeurs hebt het Huus van de Taol complimenteert met het schiere programma en de coronaproof organisatie. Renate hef angeven dat het niet allén een mooi ofscheid veur Jan was, het hef het Huus van de Taol en daormet het Drents veul andacht in de regionale pers oplevert en dat is hiel wat weerd in dizze rare periode, waarin we der amper op oet kunt um het Drents an te fieteren.

Willy Weerman hef begun van het jaor angeven dat e nao 12,5 jaor taolschulteschap (nou streektaolambassadeurschap) vindt dat het tied wordt veur een opvolger, die met frisse ideeën het Drents anfietert in de gemiente Börger-Oring. Willy blef nog an tot end december. Wij hebt in febrewari een gesprek had met een potentiële kandidaat, mar die har het te drok met zien wark en alle nevenactiviteiten dat e toch nee zegd hef. Op dit moment loopt er wat lijnties um te kieken ow een aander vinden kunt.

Rinus Bouwmeester hef een paar week leden weten laoten dat e er nao dit jaor met stopt. Bij Rinus is het een opsomming; hie kreg een tweede kleinkind, hef kritisch keken naor zien vrijwilligersactiviteiten, maar hef ok veural het gevuul dat de streektaol niet genog leeft in Assen en dat e der gien beweging in kreg. In Assen wordt op dit moment al praot met een opvolger, wij hebt goeie hoop dat die het stokkie van hum overnimmten wil.

Strategisch Beleidsplan 2021-2024

In lijn met de Cultuurnota 2021-2024 van de Provincie moew as Huus van de Taol zörge veur een nei strategisch beleidsplan. De veurbereidingen bint al in volle gang. Wij hebt er veur keuzen um veural ok aandern met te laoten praoten, zodaw ok van butenof een goed beeld kriegt bij hoe het Drents leeft en wat de kaansen en bedreigingen bint. De streektaolambassadeurs bint in twee groepen oetneudigd veur de beleidsaovends in november. Ok bint er een koppel vrijwilligers benaderd, maar ok bijveurbeeld het bedrijfsleven, de overheid, het onderwijs, culturele instellingen enz.

Anwezigheid in Beilen

De metwarkers van het Huus van de Taol warkt nog aal vanoet hoes, maar bint gemiddeld per persoon ok twei dagen in Beilen te vinden. Op maandag bint ze der allemaol, dus dan hej een hiele grote kaans um iene te treffen. De veurdeur van het gemientehoes van Midden-Drenthe is nog aal op slöt (en zal veurloupig ok nog wal niet weer van 't slöt gaon), dat betiekt wal daj altied even met oes bellen moet, um der in te kunnen.

Taolvaste praoters

Um derveur te zorgen dat het Huus van de Taol zien naam eer an blef doen hef Arja het veurnemen een groep mensen te vraogen um met te denken as der vraogen binnenkomt bij oes die niet deur ien van ons te beantwoorden is. Het giet daarbij um een groep taolvaste proters per variant, die dus ok specifieke vraogen veur heur variant beantwoorden kunt. Intussen is der al een mooie liest ontstaon, maor misschien dat in dizze groep nog andere namen boven komt drijven. Veur het Midden-Drents wordt Grietje Bakker nuumd. Bertus Mos wes derop dat bij de samenstelling van zo'n groep ok de verholding jong-old wel mut kloppen, der zit toch aordig verschil in praoten.

Veur wie nog wat te binnen schöt hiervuur kan dat mailen naor Arja.

4. Waw allemaol daon daon hebt dit jaor

Umdaw het gevuul hebt dat alles op zien gat lag dit jaor en dat der niet veul oet stro zet is, laot Renate en Arja zien waw wal daon hebt as Huus van de Taol sinds het begun van Corona en dat is best een bult!

- Stoomcursus Drents veur vekaansiegangers (volgend jaor wat oetgebreider en ok campings en vekaansieparken betrekken in de verspreiding)
- Samenwarking met Dagblad van het Noorden veur *Hier kom ik weg*. Elke dunderdag in de kraant.
- 1000 extra Zinnigs vortgeven. Waren bedoeld veur bevrijdingsactiviteiten, um oet te dielen. Maar ja..... Nou hew een oproep daon an instellingen en waren ze zo vort. Reacties waren hiel positief!

- Jan Germs hef 40 maol een filmpie opnommen veur *Even wat aans*. Weur alle warkdagen oetzunden op FB. Daor biw hiel wies met, want die filmpjes kuw ok in lezingen nog weer gebroeken.
- Neie webstee in het Drents én het Nederlands.
- Schrievers hebt filmpjes opnommen waarin ze veurdraagt oet eigen wark in *De schriever les veur*.
- Op dit moment löp de actie *Kreet veur op de container*. Zölfs Daniël Lohues har 't zien 😊.
- Op wiesneus.nl is een nei thema kommen (*Op Reis*). Dat thema stund al in de steigers toen Corona roet in het eten gooide veur veul reizigers, maor dat mak het thema der niet minder op. Dit wordt ok maakt met een algemiene insteek, hopelijk hangt de vlag der ankommen jaor aans bij.
- Het overzicht van de warkwoorden is klaor veur de zeuven varianten. Dat komp binnen een paar weken op de website.
- Het neie vortgeefboekje *Bliede* is net veur de zommervekaansie prissenteeerd. De streektalambassadeurs hebt der allemaol een koppel metnommen.
- *Rust, reinheid, in de maat* van Martijje is net veur de zommervekaansie prissenteeerd.
- Team Beilen hef een *harsenhoosmiddag* daon um neie ideeën te verzameln: hoe kuw het Drents in tiden van Corona toch an de man te brengen? Daor kwam een hiele koppel mooie ideeën oet, die deel wij nou niet, want aj daor zölf nog over nao wilt denken 'stuurt' dat misschien teveul. Dus ás der nou nog dingen bint die aj dielen wilt, mail of bel dan met Renate of Arja.

Renate markt op dat dizze tied oes oeteindelijk ok dwingt um creatiever te weden en aandere menieren te bedenken um het Drents an te fiern. Wat ok mooi metnommen is, dat de pers in dizze tied zit te springen um aander neis dan Corona, dus wij maakt nou meer persberichten, want ok kleinere dingen kriegt nou genog aandacht in de media.

5. Waw nog doen gaot dit jaor/volgend veurjaor

- Vrijwilligersdag *Koester Drenthe* op 29 oktober. Samenwarking met Drents Landschap, K&C en Drentse Historische Vereniging.
- Beurtbalkies in de supermarkten. Wij wilt veur het end van september graag van de streektalambassadeurs heuren welke supermarkten metan doen wilt en wat de ofmetings van heur beurtbalkies bint. Wij gaot de actie in jannewari doen, umdat er dan weinig te beleven is (gien kerst of zukswat). Wij laot de kartonnegies maken die in de kunststofbalkies kunt. Kosten daorveur bint veur oes. Vanzölf komt ze in de juiste taalvariant 😊. Renate lat een veurbeeld zien met een idee oet Emmen. Zij zal dizze nog an iederien deursturen, aj dan nog bij winkels komt kuj een veurbeeld zien laoten.
- De streektalambassadeurs hebt allemaol ok een stapeltie *Tegen mij kuj Drents praoten* stickers metkregen. Die kunt misschien wal op de deur bij de bakker of de slager.
- In het naojaor komt de herziene schrieversdatabank op de webstee. Renate gef an dat het een pokkel vol wark is um het der allemaol op te zetten. Gelukkig hef Jan Germs al die stukkies nog schreven veurdat e vort gung. Dat scheelt een bult wark veur Bert en Baukje!
- Verkiezing mooiste woord van 2020. Hiervuur bint de veurbereidingen net weer begund.
- LOOS 2021: ok hiervuur bint de eerste contacten al weer legd, de veurbereiding begunt eind oktober.
- Wij wilt geern een online streektalostried doen veur 't end van het jaor. Liefst met RTV Drenthe. Daor biw over in gesprek.
- Arja en Renate hebt een hiele koppel neie stukkies opnommen veur in Hemmeltied op zaoterdagmörge um 10.45 uur. Vanof zaoterdag 29 september heet dizze stukkies *Dwars deur 't Drents*. Dizze stukkies komt dommiet ok op de webstee te staon (audiofragmenten).

- In Overiessel en Grunning bint de Statenvergaderingen in meert in het Nedersaksisch. Wij bint drok gangs um dit ok in Drenthe veur mekaar te kriegen.
- Arja giet gastlessen geven op NHL Stenden PABO in Emmen. Ok hebt een koppel studenten een opdracht kregen um een dagdeel Drents op een basisschool te ontwarpen. Daor kan weer wat moois oetkommen veur wiesneus.nl misschien.
- Wij gaot een tweewekelijks stukkje doen op de radio bij ZO!34. 't Mooie is daw de fragmenten daorvan kriegt en die ok op de webstee zetten kunt.
- Op 6 oktober is der een vergadering over het preject *Heksen en Blauwvarven*. Wij hoopt daw halverwege 2021 begunnen kunt met dit preject.
- In november komp het boek *Ik trap hum an* van Martin Koster oet.
- In oktober komp het boek *Snuustern in Drenthe's natuur en cultuur* van Jan van Ginkel oet.

6. Wiesneus 2020 & 2021

Der zit wat overlap in het naowark van 2020 en de veurbereiding van 2021. Op veul schoelen hebt de kinder gelukkig tóch de Wiesneus nog had. Die ien wat eerder as de aander, maor dat mag de pret niet drukken. De kleurplaat kun online, daordeur hadden wij dit jaor zölfs reacties oet Noord-Holland tussen de inzendingen! De priesen gaot vanaovend met de streektolambassadeurs met: der waren gelukkigen die een tablet wunnen as eerste pries en as extra kedogie bint er drei boekenpakketten veur schoelen verloot.

Veur Wiesneus 2021 is het thema 'In Beweging', waarveur de Drentse redactie alweer bij mekaar west hef. Ok dit jaor komp de Wiesneus weer in vier varianten oet: Grunning, Overiessel en de Achterhoek denkt ok weer met en levert heur bijdrage.

Veurlezen kan lichtkans ankommen meert nog niet, daorveur zuuk wij een passende oplössing um tóch het Drents de klas in te kriegen. Laow hopen met mekaar dat het gewoon op de olde manier deur kan gaon.

7. 40 jaor Het Drentse Boek

Oeze oetgeverij bestiet dit jaor 40 jaor. Daor gaoj de ankommende tied nog wal 't ien en aander van zien. Der bint verschillende instanties/organisaties/bedrieven die een kedogie van de oetgeverij kriegt: een boek dat past bij heur warkzaamheden bijveurbeeld. Denk an *Kattenbende en Hondenboel* veur het asiel in Beilen.

8. Cursuswark

Körtweg lig het cursuswark op zien gat: der bint een paar cursussen die leupen, daor wordt met wat anpassingen probeerd um de eindstreep te halen. Veur cursussen die nog niet begund waren zit er niks aans op dan oetstel. Het giet daorbij um een Drenthecursus in Rune en een Moi-cursus in Een. Der giet wel een persbericht oet met een oproep um je an te melden bij interesse. As der dan in de loop van 2021 wel weer wat kan kunt er metien weer wat cursussen begunnen.

Met een groep docenten wordt er nog deurwarkt an het neie cursusboek veur Dieper deur Drenthe. Dat wordt ok gauw weer oppakt, Alja Kiers hef in jannewari een pilot in 't Anker in Hollandscheveld staon. As dat deur mag gaon mut dan de Zuudwest-variant van dit cursusboek sowieso klaar wezen.